

COMISIÓN INFORMATIVA DE COOPERACIÓN, INFRAESTRUTURAS E MEDIO RURAL

ACTA da mencionada comisión informativa, correspondente ao día **18 de abril de 2018**

ASISTENTES:

PRESIDENTE: D. Pablo Pérez Pérez DEPUTADOS/AS: D. Plácido Álvarez Dobaño D. José Antonio Feijoo Alonso D. Antonio Montero Fernández D. Miguel A. Cid Álvarez D. ^a M. ^a Teresa Cerdeira Valiñas D. Adolfo González Novoa D. ^a Susana Rodríguez Rodríguez D. Vicente Gómez García D. Armando Ojea Bouzo D. Ramiro Rodríguez Suárez SECRETARIO: D. Francisco Cacharro Gosende INTERVENTORA: D. ^a Mónica Legaspi Díaz	No Pazo da Deputación Provincial de Ourense, o 18 de abril de 2018 , ás 18.05 horas, baixo a presidencia de D. Pablo Pérez Pérez, e con asistencia dos señores/as á marxe relacionados, reúnese a expresada comisión informativa, co fin de proceder á preparación e estudo dos asuntos que se indican, adoptándose os seguintes ditames:
---	--

1º.- ACTA ANTERIOR, CORRESPONDENTE Á ORDINARIA DO DÍA 14 DE MARZO DE 2018.-

En relación coa acta da reunión anterior, correspondente á ordinaria do día 14 de marzo de 2018, non se formulan observacións quedando aprobada por unanimidade.

2º.- PROGRAMA PROVINCIAL DE COOPERACIÓN COS CONCELLOS E MANCOMUNIDADES PARA A SÚA ADAPTACIÓN AO REGULAMENTO (UE)

2016/679 DO PARLAMENTO EUROPEO E DO CONSELLO DO 27 DE ABRIL DE 2016, RELATIVO Á PROTECCIÓN DAS PERSONAS FÍSICAS NO QUE RESPECTA AO TRATAMENTO DE DATOS PERSOAIS E Á LIBRE CIRCULACIÓN DESTES DATOS (REGULAMENTO XERAL DE PROTECCIÓN DE DATOS).

Por parte do secretario expónse o contido do programa. Indícase tamén que no programa se prevé unha dotación inferior á que consta para esta finalidade no expediente de modificación de créditos tratado na comisión anterior, e que entende que en todo caso se rectificará a modificación de créditos para recoller a contía prevista neste programa, que ascende a 217.800 euros.

D.^a Susana Rodríguez Rodríguez, do Grupo Socialista, anuncia o voto a favor do seu grupo.

D. Armando Ojea Bouzo, de Democracia Ourensana, pregunta cantas mancomunidades hai operativas na provincia, informándose por parte do presidente da comisión que hai sete mancomunidades activas de carácter xeral.

Non se producen máis intervencións, e co voto favorable do Grupo Popular (6), do Grupo Socialista (3) e de Democracia Ourensana (1) e a abstención do BNG (1), a comisión ditamina favorablemente a adopción, por parte do Pleno, do seguinte acordo:

1º) Aprobar inicialmente o Programa provincial de cooperación cos concellos e mancomunidades para a súa adaptación ao Regulamento (UE) 2016/679 do Parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos (Regulamento xeral de protección de datos), conforme coas bases seguintes:

Primeira.- Obxecto:

1. Constitúe o obxecto destas bases a regulación do Programa de cooperación cos concellos e mancomunidades para a súa adaptación ao Regulamento (UE) 2016/679 do Parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos.

2. Este programa desenvolverase mediante a concesión de subvencións ás devanditas entidades locais para o financiamento das actividades necesarias para lograr a súa adaptación ao RGPD. A finalidade da subvención é colaborar economicamente cos concellos no cumprimento das obrigacións legais que veñen impostas pola citada norma comunitaria.

3. As actuacións subvencionadas poderán realizarse mediante calquera modo de xestión dos previstos na lexislación de réxime local, sendo subvencionables todos os gastos directos do servizo. Exclúense os gastos indirectos, así como os definidos como non subvencionables nos apartados 7 e 8 do artigo 31 da Lei xeral de subvencións.

Segunda.- Beneficiarios e gastos subvencionables:

1. Poderán obter subvención no marco do programa regulado nas presentes bases os concellos da provincia de menos de 20.000 habitantes e as mancomunidades que contraten persoal en réxime de dereito laboral, efectúen nomeamentos de persoal funcionario de carreira ou interino ou subscriban contratos administrativos de servizos para o cumprimento das obrigacións legais impostas polo RGPD.

2. Terán a consideración de gastos subvencionables todos os que, tendo este carácter conforme coa lexislación vixente en materia de subvencións, financien as anteditas contratacións ou nomeamentos, incluíndo gastos salariais e de Seguridade Social, así como os honorarios ou contraprestacións económicas por servizos profesionais prestados por contratistas.

Terceira.- Contía das subvencións:

A contía das subvencións que se concedan ao abeiro deste Programa de cooperación será para o exercicio 2018 de 2.200,00 € por entidade local, con destino ao financiamento dos gastos subvencionables de prestación do servizo.

A contía poderá ser inferior nos casos en que así se solicite expresamente pola entidade local interesada.

En todo caso, a contía da subvención nunca poderá exceder do 100% dos gastos subvencionables soportados pola entidade beneficiaria, polo que se reducirá no importe correspondente para o caso de que o gasto xustificado no citado concepto sexa inferior a 2.200,00 €.

Cuarta.- Disponibilidades orzamentarias:

O financiamento das subvencións reguladas no presente Programa realizarase con cargo á aplicación 4512/462.17 A Concellos. Cooperación Protección Datos, dos orzamentos da Deputación Provincial de Ourense para o exercicio 2018, coa aplicación das seguintes regras especiais:

1ª) A aprobación definitiva do Programa queda condicionada á habilitación de crédito adecuado e suficiente nos orzamentos da Deputación Provincial para o exercicio 2018.

2ª) A contía total máxima do Programa é de 217.800,00 €.

Quinta.- Adhesión ao programa:

1. Os concellos e mancomunidades que desexen adherirse ao Programa de cooperación regulado nas presentes bases deberán facelo mediante resolución do órgano competente na que se aprobe a devandita adhesión. A resolución deberá ter o contido que se recolle no anexo I destas bases, modelo que poderá utilizarse para documentar a devandita resolución.

2. Coa solicitude deberase entregar unha declaración do solicitante da subvención na que figure o conxunto de subvencións e axudas solicitadas para o mesmo fin, tanto as aprobadas ou concedidas, como as pendentes, sexan públicas ou privadas, segundo o modelo anexo II.

3. A resolución de adhesión deberá presentarse no Rexistro Electrónico Xeneral da Deputación, ou en calquera dos lugares previstos no artigo 16.4 da Lei 39/2015, do 1 de outubro, do procedemento administrativo común das administracións públicas, ata o día 29 de xuño de 2018, inclusive. Non se admitirán a trámite en ningún caso nin se concederán subvencións para solicitudes presentadas con posterioridade á devandita data.

4. A adhesión dos concellos autorizarase mediante decreto da Presidencia, no que se concederá a subvención correspondente ata un máximo de 2.200,00 euros. A resolución da autorización da adhesión deberá ditarse antes do 31.08.2018.

Sexta.- Publicidade das adhesións:

Unha vez recibidas as solicitudes de adhesión, procederase á publicación no Boletín Oficial da Provincia da lista completa ou listas parciais das subvencións outorgadas ao abeiro do presente programa, con expresión das entidades beneficiarias e da contía das subvencións concedidas.

Sétima.- Deberes dos beneficiarios:

Con carácter xeral, os beneficiarios asumirán todos os deberes impostos por estas bases e pola Lei xeral de subvencións, en todo aquilo que non resulte incompatible coas bases do Programa. En particular, quedan suxeitos aos deberes de control financeiro e reintegro nos casos previstos na devandita lei.

Oitava.- Xustificación e pago da subvención:

1. As entidades beneficiarias deberán xustificar a subvención antes da data 31.10.2018.

2. A dita subvención xustificárase mediante a presentación dos seguintes documentos:

a) Certificado expedido pola persoa que teña ao seu cargo o desempeño das funcións de intervención do concello ou mancomunidade beneficiario/a, no que se fagan constar os seguintes extremos:

- Que se cumpriu a finalidade para a que foi concedida a subvención.
- Relación de contratos/nomeamentos formalizados/realizados con cargo á subvención, indicando o seu obxecto, duración e importe.
- Contía do gasto subvencionable que foi obxecto de recoñecemento da obrigaón no exercicio 2018.
- Importe das subvencións ou axudas públicas concedidas para o financiamento dos contratos/nomeamentos subvencionados.

b) Certificación da conta corrente da entidade para a realización do pago da subvención.

Novena.- Compatibilidade con outras axudas ou subvencións públicas:

Estas axudas son compatibles con outras axudas ou subvencións, concedidas por administracións distintas da propia Deputación de Ourense ou do INORDE para a mesma finalidade, sempre que o conxunto das axudas percibidas non exceda do 100 % do gasto directo do servizo subvencionado soportado pola entidade local no mesmo período. No caso de que as subvencións percibidas excedan a devandita porcentaxe, a subvención reducirase ata conseguir o límite sinalado. A redución poderá acordarse, de oficio ou a instancia do beneficiario, en calquera momento no que a Deputación teña coñecemento da concorrencia de axudas, e mesmo con posterioridade ao pago da subvención, mentres non prescriba a acción administrativa de reintegro.

Estas subvencións son incompatibles con calquera outra concedida pola Deputación Provincial de Ourense ou polo INORDE para a mesma finalidade, con independencia da súa contía e procedemento de concesión.

Décima.- Normativa aplicable:

De conformidade co establecido na Disposición Adicional 8ª da Lei xeral de subvencións, as subvencións incluídas neste programa de cooperación réxense polas súas normas específicas. A Lei xeral de subvencións e as súas normas complementarias e de desenvolvemento serán de aplicación supletoria, excepto naqueles casos en que as presentes bases remitan ás devanditas normas, en que serán de aplicación directa.

En todo caso, será de aplicación a lexislación vixente en materia de réxime xurídico das administracións públicas e procedemento administrativo común.

2º) Someter o Programa inicialmente aprobado a información pública por prazo de dez días hábiles, mediante anuncio no Boletín Oficial da Provincia e na sede electrónica da Deputación. Durante o devandito prazo, as persoas interesadas poderán formular as alegacións e suxestións que estimen oportunas, que serán obxecto de resolución expresa polo Pleno. En caso de non formularse alegacións en prazo, o Programa considerarase automaticamente aprobado de forma definitiva, procedéndose á súa publicación no BOP e na sede electrónica da Deputación.

3º.- MOCIÓN DO GRUPO POPULAR PARA CREACIÓN DUNHA BASE DA UNIDADE MILITAR DE EMERXENCIAS (UME) NA PROVINCIA DE OURENSE.-

O presidente da comisión expón o contido da moción.

D. Ramiro Rodríguez Suárez, portavoz do BNG, manifesta a oposición do seu grupo e anuncia a presentación dunha emenda de substitución a esta moción. Sinala que existe malestar con respecto a esta proposta por parte dos traballadores do servizo de extinción de incendios forestais, e que o que se debe facer é apostar polo servizo público de extinción, que se cubran as prazas vacantes e que este servizo sexa público ao cen por cen. Dá lectura a un escrito no que se recollen as reivindicacións dos ditos traballadores.

D. Armando Ojea Bouzo, de Democracia Ourensana, di que o seu grupo, en principio, está a favor desta idea, que orixinalmente foi proposta polo Grupo Socialista, aínda que teñen pendente unha reunión cos traballadores de extinción de incendios. Por este último motivo vanse abster a reserva dun posible cambio de opinión, aínda que en principio a súa postura é favorable.

O **presidente da comisión** di que o BNG só se quedou cunha parte da moción e que o presidente da Deputación vai recibir proximamente aos representantes sindicais dos traballadores do servizo de extinción de incendios. Di que isto non é unha competencia nin un modo de substituír ao servizo de extinción de incendios, senón simplemente poder dispoñer a maiores dunha base da UME en Ourense, que ademais actúa en calquera tipo de emerxencias e non só en incendios. Engade que o Grupo Popular tamén está de acordo en potenciar o servizo público de extinción de incendios.

Non se producen máis intervencións e co voto favorable do Grupo Popular (6), o voto en contra do BNG (1) e a abstención do Grupo Socialista (3) e de Democracia Ourensana (1), a comisión ditamina favorablemente a adopción, por parte do Pleno, do seguinte acordo:

- Solicitar do Ministerio de Defensa a creación dunha base da Unidade Militar de Emerxencias (UME) na provincia de Ourense, para o cal a institución provincial prestará toda a súa colaboración a través dos seus servizos técnicos na procura do mellor emprazamento posible.

4º.- MOCIÓN DO GRUPO SOCIALISTA SOBRE APOIO Á DECLARACIÓN INSTITUCIONAL DO EIXO ATLÁNTICO DO NOROESTE PENINSULAR SOBRE O CORREDOR EUROPEO DE TRANSPORTE FERROVIARIO.-

D. Adolfo González Nóvoa, do Grupo Socialista, propón que esta moción se trate como unha declaración institucional, e só en caso de que non se aceptase como tal se trataría como moción.

O **presidente da comisión** di que esta cuestión haberá que tratala na Xunta de Portavoces.

Tras un breve cambio de impresións, o presidente somete a votación a moción e co voto favorable do Grupo Socialista (3) e do BNG (1), e a abstención do Grupo Popular (6) e de Democracia Ourensana (1), a comisión ditamina favorablemente a adopción, por parte do Pleno, do seguinte acordo:

Que a Deputación Provincial de Ourense apoie a declaración institucional sobre o Corredor Ferroviario de Mercancías Atlántico pactada no Eixo Atlántico do Noroeste Peninsular co seguinte texto:

Galicia ten unha posición xeoestratéxica privilexiada no Atlántico, baseada nas súas conexións co continente americano no seu conxunto e con Asia a través da canle de Panamá. Conta con cinco portos de interese nacional que, unidos aos portugueses constitúen un potentísimo sistema de comunicacións por mar na fachada atlántica da Península Ibérica. Todo iso configura un extraordinario potencial de desenvolvemento económico que pode e debe confluír nun hinterland que inclúa toda a Galicia interior, o Bierzo e o norte de Portugal. O desenvolvemento da fachada atlántica é un punto de equilibrio con respecto ao Mediterráneo, e é básico para reforzar a cohesión entre unha zona demograficamente moi poboada e con satisfactorios índices de desenvolvemento, e outra en alerta vermella demográfica e cuns indicativos sensiblemente inferiores.

Este desenvolvemento só pode lograrse creando as condicións necesarias para que todo o potencial marítimo existente se traduza dunha vez en crecemento económico, a través da transformación, pero sobre todo da loxística e a distribución. Para iso é absolutamente imprescindible dotar a esta rexión de comunicacións rápidas e modernas co centro da península e co resto de Europa. É así mesmo necesario que Galicia e o noroeste de Castela e León teñan unha conexión ferroviaria de mercadorías, que tamén sirva para pasaxeiros, coas prestacións e competitividade das novas liñas ferroviarias europeas, que están a ser impulsadas pola Comisión Europea dentro do que se chamaron corredores ferroviarios. Galicia debe integrarse no Corredor Atlántico que parte de Aveiro e que, pasando por Palencia e Euskadi, enlaza con Francia. Debe facelo coas mesmas condicións de velocidade e con idénticas características técnicas que as que teñen o resto de corredores, xa que é a única maneira de que as mercadorías que accedan a través dos portos do Atlántico poidan competir cos que chegan aos do Mediterráneo.

Este acceso ferroviario debe ser construído enlazando Lugo con Ourense, por Monforte, O Barco e Ponferrada. En Monforte debe impulsarse de forma definitiva o porto seco, como nó loxístico do interior galego, básico para o desenvolvemento ferroviario do noroeste peninsular. Na capital do Bierzo é tamén absolutamente preciso avanzar na posta en marcha do Enclave Loxístico da Rede Cylog, fundamental para a boa evolución da competitividade nesta

comarca. O acceso deberá confluír co Corredor Atlántico en Palencia, integrándose desta maneira nel, tal e como se contempla nos documentos da Comisión Europea.

Non loitar por estes obxectivos sería apostar pola descohesión e a asimetría económica e social entre o Atlántico e o Mediterráneo ibérico, condenar ó subdesenvolvemento e ó despoboamento ós eixos interiores de Galicia e noroeste de Castela e León (O Bierzo) e provocar a degradación progresiva dos portos galegos, condenándoos á súa total desaparición do mapa portuario e económico europeo. Os representantes sociais e políticos de Galicia e O Bierzo, reunidos no Barco de Valdeorras o 16 de marzo de 2018, lanzamos esta voz de alarma antes de que perdamos –literalmente– o último tren, coas consecuencias que iso tería. Manifestamos por tanto o noso firme e decidido apoio a esta iniciativa, e solicitamos do goberno español as medidas políticas, administrativas e financeiras necesarias para o impulso inmediato á liña ferroviaria Ourense/Lugo–Monforte–O Barco de Valdeorras–Ponferrada–Palencia.

O proceso deberá iniciarse neste ano 2018, para que estea completado nun prazo que non prexudique á competitividade dos portos galegos e do resto do territorio. Os representantes das entidades, asociacións, sindicatos, concellos e grupos parlamentarios reunidos aquí comprometémonos a presentar e apoiar esta proposta nos nosos respectivos órganos de goberno, para lograr a aprobación da mesma.

5º.- MOCIÓN DO GRUPO SOCIALISTA SOBRE OS DANOS CAUSADOS POLA AUGA NA COMARCA DA LIMIA.-

D.^a Susana Rodríguez Rodríguez, do Grupo Socialista, expón o contido da moción.

Non se producen intervencións e co voto favorable do Grupo Socialista (3) e do Grupo Popular (6) e a abstención de Democracia Ourensana (1) e do BNG (1), a comisión ditamina favorablemente a adopción, por parte do Pleno, do seguinte acordo:

1. Que esta Deputación inste á Xunta e Galicia para que realice unha avaliación técnica dos danos producidos nos concellos afectados da comarca da Limia.
2. Que esta Deputación se sume á petición unánime de declaración oficial de zona de emerxencia con carácter urxente.
3. Que esta institución solicite da Delegación da Xunta de Galicia en Ourense que se coordine e convoque unha xuntanza inmediata e urxente con todos e todas os e as alcaldes e alcaldesas da comarca para analizar as posibles medidas a adoptar e que se determine a participación, na mesma, desta Deputación como actor implicado.

4. Que se estableza un acordo que permita que esta Deputación preste a axuda necesaria, cos medios de seu, para a realización dos traballos necesarios para paliar os danos e o impacto das consecuencias dos temporais nos concellos da Limia.
5. Que se poñan en marcha, con medios propios, os estudos necesarios que determinen as posibles medidas de apoio á actividade agraria na comarca, como se fixo anteriormente.
6. Que se demande da Xunta de Galicia, a adopción das medidas oportunas diante doutros organismos, como por exemplo a Confederación Hidrográfica Miño-Sil, relativas á limpeza, roza e mantemento das canles dos ríos, regatos, desaugadoiros, etcétera dos concellos da Limia.
7. Dar traslado deste acordo plenario á Delegación Territorial da Xunta de Galicia en Ourense, á CHMS e ás alcaldías da comarca afectada.

6º.- MOCIÓN DE DEMOCRACIA OURENSANA RELATIVA A INSTALARLES Á XUNTA E AO ESTADO ESPAÑOL PARA QUE CONSTRÚAN NA PROVINCIA DE OURENSE UN CENTRO DE INVESTIGACIÓN DE INTELIGENCIA ARTIFICIAL.-

D. Armando Ojea Bouzo, de Democracia Ourensana, expón o contido da moción.

Non se producen intervencións e co voto favorable de Democracia Ourensana (1) e a abstención do Grupo Popular (6), do Grupo Socialista (3) e do BNG (1), a comisión ditamina favorablemente a adopción, por parte do Pleno, do seguinte acordo:

- Que desde a Presidencia da Deputación Provincial se inste á Xunta de Galicia e ao goberno do Estado español para que financien e constrúan na provincia de Ourense, o maior e máis equipado centro de investigación de intelixencia artificial de España, dotándoo dos medios técnicos e humanos precisos para estar na vangarda mundial (o que faría que a Ourense lle puideramos chamar “Provincia Intelixente” con todo o sentido).

7º.- MOCIÓN DE URXENCIA.- Non se presentan.

8º.- ROGOS E PREGUNTAS.- Nesta quenda prodúcense as seguintes intervencións:

O **presidente da comisión** di que ten a resposta dada pola Área de Medio Ambiente sobre os datos de consumo da ETAP de San Trocado, respecto dos cales na última reunión da comisión se advertira un erro.

D. Ramiro Rodríguez Suárez, portavoz do BNG, di que, efectivamente, estaban intercambiados os datos da subministración e os da depuración e na comisión se aclarou verbalmente, pero o seu grupo pediu que se lles dera unha aclaración por escrito.

O **presidente da comisión** da lectura ao informe da dirección de área sobre este punto, anunciando que se lle remitirá ao grupo do BNG.

Continúa o presidente da comisión dicindo que na súa condición de presidente da comisión informativa especial de incendios, explica que aínda non se convocou a primeira reunión posterior á súa constitución, debido a que na semana do 7 de maio se vai reunir unha comisión galega de cooperación local, onde se tratará un convenio entre as deputacións, a Xunta de Galicia e os concellos para a roza das franxas secundarias, no que a Xunta de Galicia achegará 6 millóns de euros; engade que nos próximos anos os entes locais (deputacións e concellos) terán que achegar diñeiro. Di que os traballos de roza os realizará Seaga e que se repercutirán nos propietarios dos predios e que se lles dará prioridade á hora de seleccionar as zonas en que se actúe aos municipios nos que historicamente se producisen situacións 2 ou unha maior sinistralidade.

E, ás 18.34 horas, dáse por finalizada a reunión, redactándose a presente acta, que o presidente e o secretario. Certifico.